



**TATA IBADAH PARTONGGOAN KELUARGA
GKPS PADANG BULAN - RESORT POLONIA**

Live streaming: www.gkpspadangbulan.com/tv

Tata Ibadah: <http://www.gkpspadangbulan.com/tatib>



TOPIK: "IPARHIRAHON NAIBATA DO HAPORSAYAONNI HALAK NAPORSAYA"

Parambilan: Pdt. Reliana Sinaga, **Paragenda/Doding:** St. Andreas Sinaga; **Singer:** Sy. Horasman Sinaga, Bp. Junawai Saragih, Bp. Jhon Periadam, **Tonggo Syafaat:** St. RB. Damanik, **Pemusik:** Sy. Jhan Saberlan Purba
Panorang: Jumat, 26 Februari 2021

1. VOTUM-INTROITUS-TONGGO

P. Pasada hita ma uhurta, pungkah hita ma kebaktianta!

Ibagas Goranni Naibata Bapa, Pakon Tuhan Jesus Kristus ampa Tonduy Na Pansing, Sitompa langit pakon tanoh on. Amen.

Sada daging anjaha sada tonduy songon nasiam na tardilo ibagas sada pangarapan bani pandiloon ai, sada Tuhan, sada haporsayaon, sada pandidion, sada Naibata, aima Bapa ni haganup, sigomgomi haganup, sitorusi haganup ampa siiani haganup. Haleluya.

Martonggo ma hita.

Ham Tuhan Naibata Bapanami na i nagori atas, puji-pujian ampa tarimakasih do sombahkonon nami hu Bamu, halani holong ampa idopni uhurMu, boi hanami mangadongkon partonggoan ijon sadarion. Sai roh ma Ham marhasadon pakon hanami. Ai hata-Mu do rigapan bani goluh nami on. Sai parsahapkon Ham ma hanami marsada-sada, ase ihagoluhkon hanami tongtong haluahon na hun Bamu. Amen.

2. Mandoding 1. Jahowa Sihol Pujionku (1+2)

1. Jahowa sihol pujionku, ai Ham do Naibata sitompa au Sai suruh Tonduy-Mu hu bangku, mangajar au mamuji goran-Mu Marhiteihitei Jesus AnakMu, ase dear dodingku hu Bamu

2. Bai Anak-Mu bobahon ahu ase Bamu iboban au homa. Sorapkon Tonduy-Mu hubangku, manogu au bai dalam na torsa Ase tongtong gok damei uhurhin, janah mesek mamuji Goran-Mu..

3. Mambasa Ayat Bulanan & Hatorangan

4. Mandoding 13. Sai Jolom Ham Tanganku (1+2)

1. Sai jolom Ham tangan ku, sai togu au Ronsi rotap hosahku, parorot au; Na dong au ra mardalan, sahalak au Sai Ham ma ale Tuhan manogu au

2. Baluti Ham uhurhu na horu in. Bai holong na tarsulur na banggal in. Sai sasap Ham dousangku, ale Tuhan. Sai gok Bamu uhurhu hunjon hujan.

5. Tonggo Pangapition

6. Mandoding 453. Pitah Ham Tuhan (1-3)

1. Pitah Ham Tuhan, hatundalan na toguh. Humbai ganup paruntolon na itanoh on. Bani haganup pardalanan, pitah Ham panjaga na gogoh. Ondos ma Tuhan, hanai on nuan, 'se torsa sadokah goluh on.

2. Tonduy Na Pansing, bere Ham bannami on. Sai useihon Ham bai uhornami 'se sintong Ase dong pargogoh manlawan, kuasa ni dunia na bajan Ondos ma Tuhan, hanai on nuan, 'se torsa sadokah goluh on.

3. Bohi pe minar, megah tong halani Ham. 'Ge gilumbang roh mandorap goluhnami in. Bani haganup parsahitan, hata-Mu do tambar na gogoh. Ondos ma Tuhan, hanai on nuan, 'se torsa sadokah goluh on

7. Ambillan : Psalmen 22:23-27

8. Mandoding 448. Mantin Ni In do Hape (1+2) Patuppu Galangan

1. Mantin ni in do hape, padan ni Tuhan Jesus
Pamalas uhur tene, bai ganup na tinobus
Dear tumang padan-Nin, na gabe sijoloman
Patoguh uhur do in bai na marpangarapan
Sai hagolukon ma in baen rudang hajengeson
Ase sonang ham ijin gok Tonduy Hasintongan
Hinalayak-Ni do in pasirsir haluahon
Janah damei uhurmin jumpahan hagoluhan

2. Sai jalo Ham Tuhan in na gabe Siparmahan
Baen hatengeran do in ronsi na ondos padan
Seng habiaran be in pori aha na masa
Ai seng ijin ujungnin, goluh ni na porsaya
Sai hagolukon ma in baen rudang hajengeson
Ase sonang ham ijin gok Tonduy Hasintongan
Hinalayak-Ni do in pasirsir haluahon
Janah damei uhurmin jumpahan hagoluhan

9. TONGGO GALANGAN – TONGGO PENUTUP

P : Ondoskon hita ma galanganta hubani Naibata, martonggo ma hita!
Ham Tuhan Naibata Bapa nami na i nagori atas. Tarimakasih ma hatahonon nami
Bamu, halani holong-Mu na bangga in na gabe hagoluhan nami. Bani panorang
on, iondoskon hanami do hu Bamu na itumpu hanami on gabe galangan nami hu
Bamu. Sai jalo anjaha pasu–pasu Ham ma galangan nami on, laho pabolaghon
harajaon-Mu pakon pararatkon hata-Mu i dunia on, gabe hasangapon-Mu.
Ibagas goran ni Anak-Mu Tuhan Jesus Kristus Tuhan nami. Amen.

Riap ma hita martonggo, marhitei tonggo na niajarhon ni Tuhan Jesus hubani
susian-Ni!

P+K : Ham Bapa nami na i nagori atas. Sai napapansing ma goran-Mu. Sai
roh ma harajon-Mu. Sai saud ma harosuh ni uhur-Mu i nagori tongah on songon
na i nagori atas. Bere Ham ma bannami sadari on hagoluhan ari-ari. Sasap Ham
dousanami songon panasapnami bani dousa ni hasoman na mardousa dompak
hanami. Ulang hanami bobai Ham hu parlajouan, paluah Ham ma hanami
humbani pangagou. Ai Ham do simada harajaon pakon hagogohon ampa
hasangapon sadokah ni dokahni. Amen.

P : Jalo hita ma pasu–pasu hambani Tuhan Naibatanta.
Idop ni uhur ni Tuhan Jesus Kristus, pakon holong ni ateini Naibata Bapa, ampa
parsaoran ni Tonduy Na Pansing ma mangkasomani hita haganupan. Amen

**K: Diate tupa ma, bamu Ham Naibata
Ham Bapa na i Surga, diate tupa ma
Amen... (mandodingkon)**